


菽莊主人四十壽言

黃搏扶
題簽



藏莊呈介十歲亥

龔煦題



叔臧林先生四十雙壽序文

自古英奇俊偉之士類皆不泯泯然苟同於世而充其所至亦各以器量自見然而廊廟之彥喜言功名之盛山澤之癯樂稱志節之美二者隨所得而致焉非可兼而有也豈不以人性不同如方員黑白儼處於對待之地其不能合并者勢實使之然歟準斯爲斷而古來書傳所載可得而按也是故身當大難之衝道濟太平之業澤被乎生民功高乎當世書名竹帛厥稱甚偉然或

一旦而棄之寬閑寂寞之鄉則愀然不怡嘆詫累日是亦不善處窮者也其或脫屣王侯之尊土苴卿相之貴宅心於無營循分而自得高則高矣吾無閒焉然使之立乎百官之上其能決謀定議事出萬全者亦非吾之所敢任也夫其所有餘者如此所不足者如彼而揆之易有出處語默之訓孔有仕止久速之義其不合者固已多矣夫天之所以與我者既無一定之境而我乃各執其偏以應之其道不綦狹矣乎然而自古及今求其

能博觀乎仕隱之趣而曲協乎靜作之用者如是其不可多得何也若吾友叔臧先生殆近之矣先生少時英敏秀出讀書好略觀大意而不屑爲章句之學至於論人才之盛衰政治之得失上下千百年娓娓不倦雖老生宿儒無一復難識者嘆爲異人先生世居臺陽甲午中東之役隨其尊人侍郎公挈家內渡始卜居廈門之鼓浪嶼先生見中國方亂慨然有澄清宇內之志日與二三同志講求經國庇民之計會清朝命王參議清穆

攷察東南商務道出廈門與先生語大異之乃具疏上
聞力言先生才可當大任宜破格擢用以開求賢之路
朝廷俞其請遂以道員奉調入京以京堂內用旋命總
理廈門商務居職五年百廢畢舉部臣才之派充福建
全省礦務議員又經度支部派充爲調查幣制員農工
商部復舉爲頭等顧問官是時先生已擢侍郎駸駸大
用矣會武漢事起時局大變遂跼伏不出家有小園頗
具亭臺水木之勝日與四方文人學士嘯咏其中翛然

不以世事爲意閒或布衣草履與田夫野老相聚笑語
見者不知其爲貴人也執政有荐之者屢命起之於家
俱婉辭不應其冲澹之旨夷曠之韻回視其爲貴公子
時以至身躋通顯名位烜赫幾若兩人然以吾言之充
先生之道無所絀於前無所慍於後適乎進退之宜而
渾乎顯晦之迹其又何施而不可哉先生娶夫人龔氏
爲詠樵贊善之女有賢德有子七人皆才器偉異先生
年纔四十今已抱孫矣家庭禔福喜可知也抑余更有

請者今天下雖號粗安然貧弱之形情見勢絀伏莽尙
多伺釁而動至於人心風俗之憂日甚一日不有大賢
孰與爲治先生戢影衡門自爲計則得矣惟日處橫流
瀕洞之中其亦有惻然不能自己者耶若夫古來所載
高士逸民諸傳如余之迂謬無用於世正可假之以掩
其拙已耳而非世之所望於先生也今歲五月爲先生
初度之辰其世兄景仁以書來請余一言爲壽余曩者
讀先生所作菽莊記而好之以爲是工於辭者今復得

其立身行己始末知先生不僅一文人已也謹陳述古
義附以己意敢以質之座右因以爲壽若夫尋常頌禱
之詞度非先生之所願聞故略之謹序

侯官吳曾祺拜撰

閩縣于君彥拜書

叔臧林侍郎暨德配龔夫人四十雙壽序文

維民國二年之二月余自北京大學乞假南歸共和黨人以閩支部副部長相屬而福建省議會秘書長乏人亦令余承之於是獲與六十邑人士相接余之深知叔臧先生蓋在此時也其年六月余再至京師於閩事殊少聞問然閩人來者猶時道先生行事先生以世家子負海嶠重望天下士無論識不識皆知有先生進步黨成先生實與有力近者北京本部推爲名譽理事黨事

之資藉於先生者固非淺鮮先生之華實並茂如此宜
吾鄉人之引以爲重也先生久居臺嶼乙未之役移家
內渡清室末造當軸者鑑時勢之急頗求海內人材於
是先生始奉調入都旋以商務礦務之故出居閩廈度
支部農工商部亦徵調相屬歷階至侍郎鉞鉞乎大用
矣會武漢事起先生遂不復出改國以後壹志實業吾
黨興以先生習於政治也數以黨事相咨先生亦竭盡
心力以益吾黨蓋先生生長於臺習聞中外之情僞凡

東西新政中土人士所未聞者先生早已聞之中年數
歷內外學識益宏故其在鄉里時言論之所發揮者皆
足爲黨人資今論者頗以不居大位爲先生惜予則以
爲吾國他日有事於政黨與實業者方大且遠以先生
之才世之所望於先生者固不僅在服官之末也自新
政興海內知政黨之亟於是以黨名無慮數十顧深知
其體用者千百人中殆不能一二其或以政黨爲名而
斂取多金獵弋名位則尤足以隳政黨之大信數年以

來各黨所以不振者職是之由予謂一黨之成必有獨立之黨員而後乃能爲獨立之政黨黨員之學術才技足以自贍而又有無量之實業家隨諸其後政黨乃可得言觀英美政黨之所以盛與法蘭西政黨之所以衰可以思過半矣乃觀吾國之言政治者恆輕實業言實業者亦恆斥政治夫不以實業爲政治之資則政治幾何能淑不以政治爲實業之盾則實業幾何能興獨先生以政治家而兼實業家居閩粵之間慨然有以自任

異日所成就寧復可量斯蓋當世之光非徒吾黨之幸也先生既不復言仕因累却執政之徵息影衡門翛然自樂乃築菽莊以居遍徵海內名流爲之題詠先生亦自爲之記其文冲夷淡泊雅稱其人非特幹濟之才有足多者文學亦非恆人所能幾也德配龔夫人有賢德克相其家有子七人皆嶄然出頭角先生年方四十現已抱孫一門之內雍和肅穆藹藹如也予旣習於先生嘗爲文以題菽莊矣今歲五月爲先生四十初度諸公

欲有以爲先生壽世兄景仁亦來乞言幸託友朋之末
因黨人屬誼不能辭乃舉平日所知者爲先生貢一言
至於南山北海尋常禱祝之詞非吾黨所宜加於先生
者予亦不敢以進也謹序

閩縣陳遵統撰書

叔臧林先生暨淑配龔夫人四十雙壽

天降雄彥卷舒委隨道牟羣仙驩樂攸好此叔臧先生
之所以不可及也夫陀移修禪主旨鋪棻紛若史巫之
詞擯於雅頌之列古者壽人不以文字強仕不以祝延
然陳檢討之壽閭梓勤也才及冠耳吳祭酒之壽劉壽
峰也亦僅艾耳以今準昔可得而言先生振奇於戈印
之年毓秀於旂鈴之夢門惟黃散家鮮白丁灼灼崔儵
身入五千之室珊瑚李泌手營三萬之籤裴遵慶海上